

# **Deklarasaun Konjunta**

## **Koligasaun Agrikultura Timor-Leste no Rede-HASATIL**

### **Kona-ba Orsamentu Jerál Estadu (OJE) 2022**

Dili, 28 Janeiru 2022

Koligasaun Agrikultura Timor-Leste mak rede ne'ebé envolve Organizasaun sosiedade sivil agrikultór, grupu ema ho defisiénsia, setór privadu, grupu fetu iha agrikultura, organizasaun juventude, LGBTI, grupu kooperativa inklui movimentu sosiál no grupu sira seluk ne'ebé iha interese atu dezenvolve setór agrikultura no promove setór ekonomia produtivu ne'ebé sustentável no inkluzivu iha Timor-Leste.

Koligasaun agrikultura ho rede HASATIL iha momentu ne'e nafatin louva ba agrikultór hotu, grupu prosesador ki'ik sira, grupu artejenatu sira no grupu hotu ne'ebé kontinua hala'ó atividade ekonomia kreativu sira iha rai laran. Maski iha Timor-Leste grupu sira ne'e kontinua enfrenta dezafiu no problema oin-oin iha setór ekonomia produtivu sira, maibé Koligasaun enkoraja ita boot sira atu labele lakon esperansa hodi kontinua hala'ó servisu nafatin.

Iha Proposta inísiu OJE 2022 ne'ebé Governu submete ba Parlamentu Nasionál ho montante Biliaun \$1.675. hafoin debate iha plenária membru parlamentu konsege propoin tan proposta hamutuk 165. Proposta hirak ne'e tuir mai aprova husi deputadu sira ne'ebé fó implikasaun ba tetu OJE 2022 nian aumenta to'ó Biliaun \$1.949. Situasaun ne'e obriga governu tenke kontinua foti osan husi Fundu Petrolíferu Biliaun \$1.311 boot liu RSE (Rendimentu Sustentável Estimadu), pratika ne'e kontinua fó ameasa boot tebes ba sustentabilidade Fundu Petrolíferu. Parte seluk, dezenvolvimentu setór produtivu sira nafatin la hetan prioridade husi governu iha OJE 2022 hodi asegura sustentabilidade ekonomia povu ki'ik sira nian.

Relasiona ho OJE 2022 ne'ebé Prezidente da República promulga iha loron 3, Janeiru 2022 tuir ami nia observasaun no analiza nafatin seidak fó prioridade ba setór agrikultura no setór produtivu sira seluk, tuir mai Koligasaun Agrikultura no Rede HASATIL hakarak hato'ó ami nia rekomendasaun liu husi deklarasaun konjunta no kontinua bolu atensaun maka'as ba Governu, Parlamentu Nasionál no Prezidente da República no ba públiku katak:

1. Governu, tenke uza osan povu nian iha OJE 2022 ho didi'ak no kuidadu hodi hadi'ak no hakbiit duni ekonomia povu nian, hadi'ak problema malnutrisaun, inseguransa ai-han, hamenus kiak iha rai laran, liu husi promove no dezenvolve setór agrikultura, indústriá ki'ik transformadóra sira, kooperativa agrikultura, peska no pekuária, tanba setór hirak ne'e mak fó oportunidade no fornese kampu servisu ba ema barak. Aleinde ne'e sei hadi'ak ekonomia no fó rendimentu ba família no responde ba des-igualdade sosiál iha rai laran.
2. Investe no promove agrikultura familiar ne'ebé eziste nanis ona iha ita nia rain, Agrikultura familiar bazeia ba rekursu lokál sira, hanesan matenek lokál, fini lokál, no pratika agrikultura ne'ebé di'ak ba ekolojia no haforsa ekonomia família. Governu tenke proteje família agrikultór sira atu sira labele monu ba lasu kompañia boot sira, liu husi sistema sira ne'ebé halo agrikultór sira tenke depende ba fini íbrida, adubu kímiku no pestisida kímiku sira.
3. Investe no kontinua fó apoiu treinamentu, ekipamentu inklui finansas ba joven agrikultór sira ne'ebé daudaun ne'e halo ona produsaun agríkola, hortikultura, pekuária, prodús adubu orgániku, peska no aqua-kultura iha nivel munisipiu to nivel Aldeia.

4. Dezenvolve no hadi'ak infra-estrutura iha nivel Suku to'o Aldeia hodi haforsa comunidade sira liu husi harii irrigasaun eskalaun ki'ik ne'ebé fornese bee ba uma kain sira hodi halo toos, kuda modo, hakiak animal iha tempu ne'ebé laiha udan. Apoiu no suporta Konservasaun agrikultura, re-florestasaun no Konservasaun bee matan atu kontinua fornese bee ba comunidade iha tempu bailoron naruk. Hadi'ak estrada no ponte sira to'o nivel aldeia atu comunidade iha asesu nafatin ba merkadu.
5. Promove sistema agrikultura inkluzivu, hodi fasilita partisipasaun hanesan ba ema ho defisiénsia, feto sira, LGBT, no mós foin sa'e sira, iha atividade sira ne'ebé liga ba setór produtivu sira, inklui produsaun, distribuisaun, merkadorias, prosesamentu no mós laboratóriu hodi teste ba qualidade produktu ai-han sira iha rai laran.
6. Husu ba Parlamentu Nasional atu hala'o sira nia knar hodi halo monitorizasaun no fiskalizasaun ba ezekusaun OJE 2022 nian to'o iha nivel baze, hodi hatene implementasaun programa husi governu nian no oinsá nia rezultadu ba hadi'ak povu nia moris.
7. Enkoraja kandidatura Prezidente da República RDTL hotu atu integra iha ita boot sira nia programa no planu kona ba asuntu diversifikasaun ekonomia liu husi investimentu iha setór agrikultura no setór produtivu seluk, dezenvolve irrigasaun eskalaun ki'ik no boot, dezenvolve estrada rural, merkadu lokál, bee moos, facilidade saúde no edukasaun ne'ebé inkluzivu.
8. Husu ba membru rede Koligasaun Agrikultura iha munisipiu sira hotu no mós organizasaun sociedade sivil sira seluk atu kontinua ativu no monitoriza ezekusaun OJE 2022 liu husi implementasaun programa governu nian iha Munisipiu, Postu Administrativu, Suku to'o nivel Aldeia iha Timor-Leste nune'e bele asegura katak programa governu iha qualidade bele hatudu rezultadu ne'ebé di'ak no fó duni benefisiu ba ita nia povu.

Kmanek wa'in ba ita hotu!

Viva Agrikultura Timor-Leste,

Dili, 28 Janeiru 2022

Asina husi:

- |  |  |
|--|--|
| 1. HASATIL   | 9. Mata Dalan Institute                          |
| 2. La'ó Hamutuk                                    | 10. Grupu Be salin                               |
| 3. PERMATIL  | 11. Grupu Hatajo                                 |
| 4. UNAER – Ermera                                  | 12. Timor Leste Organic Fertilizer (TILOFE)      |
| 5. Oxfam iha Timor-Leste                           | 13. FBN  |
| 6. Ra'es Hadomi Timor-Oan                          | 14. Forum Juventude Defisiénsia Ermera           |
| 7. Alumni Parlamentu Foin sa'e Timor-Leste (APFTL) | 15. EAMO   |
| 8. Kdadalak Sulimutuk Institute (KSI)              | 16. Youth for Blue Action Development Initiative |
|  | 17. No Membru Koligasaun sira seluk.             |